

Date – 01/01/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- Khauh taka khap a ni chungin kum hlui thlah a Kum Thar lawmna'n nizan khan halpuah leh halmawi hal a ni.
- Home Minister Pu K. Sapdanga'n Mizoram mipui za a 80 ai a tam mahin halpuah leh hal mawi hal khapna thupek an zawm a ni, a ti.
- Nizan khan kohhran hrang hrangin "Kalta te Pual" inkhawm hmangin vawiinah hlim takin kum thar an lawm.
- Portal pakhat atanga zirna atana mamawh chi hrang hrang hmuh theihna tur, One Nation One Subscription hawn a ni.



FIREWORKS

Khauh taka khap a ni chungin kum hlui thlah a, Kum Thar lawmna'n nizan khan halpuah leh halmawi hal a ni.

Nizan kum hlui leh kum thar inthenna zanlai dar 12 thlen dawn tep atang khan halpuah, halmawi leh a behbawm hal tan ani a, kum danga dar 11 leh a chanve emaw dar 11 leh minute 45 emaw vel atanga hal tan ang kha ni lovin Zanlai dar 12:00 hmaa puak a awm meuh lova, dar 12:00 leh a hnu lamah minute 20

chhung vel puak ri hriat tur leh hmuh tur a awm ani. District khawpui hrang hrangah halpuah hal awm ve bawk mah se a nasa lo vek a, Hnahthial ah phei chuan halpuah ri hriat a ni lo ani. Aizawl veng hrang hrangah halpuah, hal mawi leh a behbawm hal hi kum hmasa lam chu pha chiah lovin lang mah se a nasa thaw khat hle a. A puak ring chi thlengin hal a ni. Sorkarin theihtawpa halpuah leh halmawi hal lo tura thupek a siam leh tlawmngai pawlte'n an thlawpna chuan duhthusamin zawm a hlawh lo nia sawi a ni a, Aizawl SP pisa atanga thu dawn danin nizan kum hlui thlahna leh kum thar lawmna atana halpuah, halmawi leh a behbawm dang, sorkar thupek zawm lova hal chungchangah hian Aizawl khawpui chhung Police station-ah thubuai 13 ziahluh a ni a, mi 12 man an ni. Hei bakah hian thubuai siam tura enzui tur 23 a awm bawk. Nizan damdawiin casualty pantu zingah halpuah hal vanga hliam nei 2 an tel a ni.

Police hotute sawi danin he'ng bakah hian drone leh thlalakte, dang hmanga thlalaka sorkar thupek bawhchhetute zawng zawng enfiah a tihchian chhoh zel tum a ni a. Thubuai pawh hi ziahluh belh zel a ni a, vawiin tlai-ah pawh hian danglam chho zel theih a nih rualin ni 3/ni 4 liam hnu-ah thil awmdan a Chiang thei tura ngaih a nih thu Police hotute chuan an sawi a ni.

Mizoram Pollution Control Board secretary Pu C. Lalduhawma'n Akashvani Aizawl a hrilh danin kumhlui thlah zana halpuah hal vanglai dar 12 leh zing dar 1 khan Air Quality Index (AQI) chu 115 a ni a, nikumah erawh 597 a ni. Kumin aiin nikum khan a lêt 5 vel laiin a sang zawk tihna a ni.

Kolasib ah chuan zanlaia kumhlui thlahna leh Kumthar lawm na ni pah fawm in Halpuah leh a kaihnawih hal ri hriat tur a tam hle. Harsatna lian tham thleng erawh a awm lova, Hemi hun chhung hian Police Station hrang hrangah thubuai ziah luah a awm lova, chhui zui tur thubuai tenau 6 a awm thung.

Serchhip leh a chheh velah pawh nizan khan kumhlui thlahna boruak muanawm tak hnuaiah neiin, YMA leh police te, Krismas lai ang takin an duty leh a. Zanlai dar 12 velah halpuah leh halmawi hal engemaw zât hmuh an awm a, thil duhawm lo thleng erawh a awm lo a ni.

Champhai khawpuiah nizan khan halpuah leh halmawi chi hrang hrang sawrkar, kohhran leh tlawmngai pawlte ngenna ngai pawimawh lova hal lui engemawzat an awm a. Kum dang ngaihtuah erawh chuan hal uar lova, kum thar hma lawk atanga

kum thar hlim, minute 15 chhung vel hmun thenkhatah halpuah leh halmawi an hal a ni. Hetihlai hian East Tuipui biala khaw tam zawkah chuan halpuah leh halmawi hal sawi tur awm meuh lova, Hnahlan tlangdungah pawh halpuah hi khaw hrang hrangah pawh hal an awm meuh lo nia thu dawn a ni.

Nizan khan Lawngtlai khawpui ah pawh boruak a thlawk chi halmawi lam chi kumdang ang bawkin mittitlai tham hmuhtur a awm a. Kumhlui thlah zanah boruak duhawm lo thleng hriattur a awm lova, Lawngtlai Police ten dan bawhchhia man an nei lo a ni.

<><><>

GOVERNOR

Larsap kal chhuak tur Dr. Hari Babu Kambhampati chuan naktuk hian Aizawl a chhuausan ang.

Larsap hi sorkar mi pawimawhte'n an thlah dawn a. Naktukah hian Odhisa khawpui Bhubaneswar thlengin a tuk leh Zirtawpni khian Bhubaneswar Raj Bhavan-ah thu tiamtirin Odhisa larsap atans lakluh a ni dawn a ni. Pu Kambhampati hian July ni 19, 2021 khan Mizoram larsap hna a chelh tan a, P. S. Sreedharan Pillai a rawn thlak a ni. A hun chhung hian Mizoram hmun hrang hrang a tlawh kual a, Mizoram hmasawna atana rilru leh ngaihtuahna seng tak ni a ngaih a ni a. A bikin sorkar laipui-in mirethei zawkte khaichhuahna atana ruahmanna a siamte Mizoram a a mamawhte'n hmang tangkai tawk lo leh hre tawk lova a hriat avangin hetiang lam hi thahnemngai takin a tlangaupui thin a ni.

Odhisa larsap a ban avangin a aiawhtu atana ruat a ni a. sGen. Vijay Kumar Singh - an a rawn thlak dawn a ni.

<><><>

HOME MINISTER

Home Minister Pu K. Sapdanga chuan, Mizoram mipui za a 80 ai a tam mahin sorkar thupek, halpuah leh halmawi khap an zawm chu lawmawm a tih thu a sawi.

Aizawl Police Station-a Akashvani palai-in a kawmna-ah Home Minister chuan Mizoram Sorkar leh tlawmngai pawlte'n kumhlui thlahna atan leh kumthar lawmna atan halpuah leh

halmawi hal lo tura mi tin an ngen thu leh theihtawp an chhuah thu a sawi a. Hemi kawnga nasa taka thawktute hnenah lawmthu sawiin, heti a nih lai a mi tlem te, sorkar thu leh YMA-te ngenna zawm duhlo an awm chu pawl a ti takzet ani, a ti. Pu K. Sapdanga chuan halpuah leh hal mawi hal luitute hi sorkar phal loh ti lui an nih avangin a dan ang taka an chungah hremna lekkawh a nih tur thu a sawi a, hemi kawngah hian Mizoram police lamin hma an lak nghal thu sawiin, kum lo kal tura hunpui lo thleng leh turah pawh halpuah leh halmawi khapna thupek hi Mizoram sorkar chuan kalpui zeldawn ani a ti bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

NEW YEAR CELEBRATIONS

Kum 2024-a zan hnunung ber, nizanah khan Mizoram Kohhran hrang hrang te chuan hemikum chhunga kohhran member thi tate sun na'n "Kalta te Pual" hun an hmang.

Presbyterian Kohhran chuan kum khat chhunga Kohhran hmalakna hrang hrang te tarlan ani a, thu chhiar inchhawn (Responsive Reading) neiin, Pathian thuchah tawi ngaihthlak a ni bawk. Kalta te pual inkhawm hian ngaihhlut a hlawh thei hle a, veng hrang hrang atang pawhin an chungkhat lainate an sunna Biak Inah an inkhawmpuii a, kohhran tam zawkah chuan kalta te pual hian Kohhran Zaipawlinhla an rem ani.

Vawiin, kum thar ni hi Mizoram pumah kohhran hrang hrangin Pathianni angin Pathian biak inkhawm an nei a, nilengin hun an hmang. Biak-ina inkhawm bakah lengkhawm zui an awm a. Kohhran thenkhatin ruai nena kum thar an lawm lai-in thingpui ruai nena lawm a, naktuk lama ruai theh tur an awm bawk. Hriat theih chinah Presbyterian tualchhung kohhran tam ber chuan vawiin Kum Thar ni-ah hian ruai theh lovin naktuk lamah an theh

dawn a. Vawiina ruai theh naktuk lama nawn tur an awm nual ni a thu dawn a ni.

Lawngtlai-ah chuan kohhran hrang hrang ten nizan khan zanlai inkhawm buatsaihin, sual thupha chawi leh kumthar atana inhlanna hun an hmang a. Vawiin chawhma khan BiakInah inkhawmin zaikhawm chhonzawm a ni a, tlailamah Kumthar ruai an theh. Kolasib-ah chuan vawiin khan Catholic, ICI, UPC leh kohhran thenkhatin Kum thar lawmna ruai theh a ni. Lunglei khawpui chhunga tualchhung Kohhran hrang hrangte chawhma lamah kumthar lawm na'n an inkhawm a. Inkhawm banah Kumthar lawmna thingpui ruai kilho ani. Kumthar Ni hian Lunglei Khawpuiah chuan kumthar lawmna ruai buatsaih an awm hriat a ni lo a, naktuk lamah kumthar lawmna ruai tualchhung Kohhran hrang hrangte'n an buatsaih ang. Champhai-ah pawh Kohhran thenkhatin vawiin khan chhang ruai an kilho a, naktuk ah kumthar lawmna ruai an kilho ang.

<><><>

ONOS LAUNCHED

Internet portal pakhat atanga zirna atana mamawh chi hrang hrang hmuh theihna tur, One Nation One Subscription (ONOS) chu vawiin khan hawn a ni a, he scheme hi zirlai leh zirbing mite bakah zirna in hrang hrang-te tan a chhawr nahawm hle tura beisei a ni. He portal-ah hian research paper, journal leh zirlaite mamawh chi hrang hrang dah a ni a, sorkar enkawl university leh IIT-te bakah zirlai dang vbch 1 leh nuai 8 chuangten an zir zelna atana an mamawhte, he portal atang hian an hmu thei vek dawn a ni.

ONOS-ah hian a thawh khatnaah science, technology, engineering, medicine, mathematics, management, social science leh humanities chungchanga thuziak chi hrang hrang, sing 1 sang 3 leh 400 chuang dah a ni a, Principal Scientific Adviser, Prof. Ajay Kumar Sood-a sawi danin, ONOS hi private institution-te leh mimal a duh apiang hman ve theih turin tihlen chhoh zel tum a ni.

<><><>